



QUÆSTIO MEDICA.

QUODLIBETARIIS DISPUTATIONIBUS
manè discutienda in Scholis Medicorum, die
Jovis 13. Januarii.

M. ÆGIDIO LE BEL, Consiliario,
Serenissimæ Aurelianensium Ducissæ
Medico Primario, Præside.

An animi morbis Medicina?

I.

TOTUS homo à naturâ & nativitate morbus, non
animo minùs puerascit, crescit, ægrotat, senescit
& occidit, quàm corpore: fatum ineluctabile, illi
commune cunètis cum animantibus, à primordiis conten-
tiosæ hostiliter indolis ortum; quæ dum amicè collimant,
quod rarum, vitæ fovent lares, lethumque properant,
cum dissident, quod frequentius. Sit licèt venter docilis,
beneque moratus salubri se refeciat escâ; sis licèt omnino
tutus à gulâ; omnes queis jugiter, miserè & insidiosè tor-
queris animi affectus, lubrici & præcipites sunt ad mor-
bum & interitum gradus: unde vita brevis & velut umbræ
transitus, nostro simul & naturæ errore. Nec est sciscitari,
quæ sit perturbationum, cupiditatum & morborum animi

A

2

parens, corpus an animus; sub iudice non lis est; ab utroque fonte scaturiunt, & quæ regere hominem & corpori præesse fertur mens, non frænât, sed commovet; non frangit, sed interdum stimulat; non compefcit, sed excutit; & viriant artus agræ contagia mentis. Ne tamen opineris causis ideo morbificis animam oblædi, & fore Libitinæ prædam: Quandiu materiæ copulatur, trahitur extra metas, cum in animi pathematis, tum ejus in ægritudinibus; in quibus quotidie titubat ratio; cæspitat animus; aberrat quoque mens; & objectorum vehementiâ rapitur extra cancellos. His procellofis æstibus sedandis appetitûs sentientis, præcepta moralia in exhedris Philosophorum laboriosè congesta, in vanum sunt auxilio. In animi morborum impetu, mens materiæ desponsât injurias; & corpus onustum hesternis vitiis animum quoque prægravat unâ; atque affigere videtur humo divinæ particulam auræ.

I I.

ANIMUS non anima, sed corporis & animæ simul Agentium actus præcipuus, gravioribus, imò & curatu difficilioribus afficitur morbis; quidni? etiam hæreditariis, quàm corpus. Anima enim huc usquè incomprehensa, necnon incomprehensibilis, de cujus essentiâ ridiculè admodum obganniunt Philosophi, qui eam definire contendunt, non aqua, non numerus, non ignis, non calor natus, non sanguis, non *ἑτελέχεια*, non actus corporis organici potestate vitam habentis; sed quantum concipi potest, vitale flamen, auraque spiritalis, innata, à Divinitate effusa; functionum corporis viventis principium & causa; in homine unica; at vi & virtute triplex; solâ fide immaterialis perspecta; corpori obscurâ unione & vinculis dictu inexplicabilibus concatenata; veluti rea incarcerata, vices & vicissitudines subit ergastuli; libera tamen quandiu sui juris; sed compedibus corporis quasi involuta; ut servi ergastulariis; morem gerit materiei; & spirituum corpusculorum alioquin tenuissimorum fere atomorum, si velis, faventibus auxiliis, tota in toto, & tota in quâlibet parte, pro perfectiori aut imperfectiori organo-

rum conformatione, & justâ vel indebitâ temperiei dispositione, alacriter aut desidiosè vegetat : dum sibi suisque providet ; obtusè aut acurè sentit, dum urgetur perturbationibus ; rectè aut malè ratiocinatur, cum sensuum exploratorum satellitio imaginatur, intelligit & meminit ; unde quamvis sui semper similis, & naturâ suâ immutabilis, alienas nihilò tamen minùs, corporeas videlicet sustinet motiones & mutationes : quocirca animi moribus præest temperamentum ; nubila mens & vinceta frænis, tuta etiam timeret, verenda stolidè spernit, colenda odit, odiosa deperit, adversa cupit & sitit, ex minimis stomachatur, levi & nullâ datâ occasione gaudet & dolet, absque causâ furit & ferit, rareret aut nusquam sapit, ut plurimum decerrat, hallucinatur, atque delirat. Hinc homo sibi ut homini lupus, milleque malis animi ut vitis divexatur.

III.

SUPINE' admodum & multiformiter se habent animi, prout sædâ & multifariâ scarent illuvie corpora, venosumque genus variis humoribus vitiato refertum est crüore. Hinc quamvis animæ naturâ & dignitate pares, major tamen inest animis, quàm corporibus & vultibus dissimilitudo ; quòd illæ immutabilitatis dotis, hi commutationis sortis sint participes ; unde tam dispar morum & animorum discrimen, qui à corporis contagio molliter exciti apprimè stimulantur passionibus ad boni studium, aut mali fugam ; effrænate verò perculsi enixè vexantur ægritudinibus. Hunc subit & subigit in sui perniciem personatâ dulcitudine, suavis initio, dirus postmodum & inenodabilis amor, vigiliarum comes assiduus, mæroris, angoris, & sollicitudinis fons uberrimus, omniumque ferè malorum Læna, ut & multorum morborum Excetra. Illum ira, furor brevis, rabies dein evasura, adversa quieti & nusquam senescens ut zelytypia, mentis impotem reddit ; & properato derepentè intùs foràs, nonnunquam foris intrò, quod pejus, sanguinis & spirituum motu, universam corporis molem inflammat ; & incentivo posthac sanguinem humoresque dum retorret æstu, rationem subigit, & de suâ sede dimovet. Is, effusâ

lætitia, ingentis doloris & lætæ prænuntiâ, gestit, exultat, bacchatur, & quod putavit fore gaudium, id exitit exitium; quod si vehemens, repentinum, & inexpectatum, ita fatale, ut syncopem & subitanam necem accersat: quæ fere similia odium sævit in nos symptomata. Cui verò ancipiti mens anxia obtupet formidine, coercitis intus spiritibus calore perfusis, cor nimio sanguine & fervore impetitur, premitur & obruitur; algescunt sudore frigido partes extrema: torpor occupat artus; horrore rigent comæ; vox faucibus hæret: ac veluti flamma in angusto conclavi coarctata marcescit & extinguitur; sic in timore, pessimo rerum interpretate, concidunt vires, flaccescunt, & hebescunt spiritus; pallet, contremiscit & languet corpus, ejusque tota invertitur œconomia, alvo ingratis solutâ, & urinâ invito profusâ; canescunt quoque interdum derepentè capilli, ipsaque mens est in tergoribus. Nec moerore minùs afficitur animus, quàm affligitur corpus; qui spiritus innatumque calorem dum obterit, menti tenebras & caliginem offundit; dum corpus perpetuis exsiccat vigiliis, animum trahit in aberrationes & hypocondriacos affectus; dum concoctionem labefactat, sanguinem & humores incrassat, exaggerat, exuritque succum melancholicum, animum simulæ vertiginis, epilepsiæ & fatuitatis labe inficit. Quàm multos quoque videas lucis usuram reddere fastidiosâ excarnificatos superbiâ (*Inquinat egregios adjuncta superbia mores*) urit miserum pectus avaritiæ fœdissima nutrix ambitio: utraque vigilantibus excita curis proprias depascit medallas, cum aliorum invidet forti & auro, sibi què indulgens & livoris comes, crescit in immensum, & alterius rebus marcescit secundis; atque pro diversâ cujuscumquè temperie, variè corpus & animum obledit atque violat. Nec verecundia salva semper res est, bonæ licèt indolis soboles, Diodoro, & Homero olim capitalis, quæ exolutis affatim spiritibus, aphoriam infert, & interdum è medio tollit ægrotum. Eodem calculo, zelotypia amoris, gloriæ, & ambitionis fidelis assecla, solis ingeniosis & solertibus intimè, non fatuis & barbaeis, familiaris, sagacibus idcirco belluis non ignota, cor-

pus & animum, diceret animam, si sentiret, ita inordinatè, impatienter, & impotenter exagitat, ut omne tollat sævioris perturbationis & ferocioris animi morbi punctum; nulla illi mora, nulla requies, nullusque modus; ubique incendium, quo viscera conflaurant & exæstuant spiritus.

I V.

QUI fit? amabo, ut multimodi tot populorum mores à se invicem tantoperè distent, ut tantæ tot hominum tamque dispariter concitentur passionès; ut dissimiles tot animorum nascantur morbi; discrepantes tot mentium virtutes propalentur; varia tot ingeniorum appareant vitia; tam maximè dissidentes tot Sophistarum excogitentur opinionès; & dispariles tot Philosophorum, tot Judicum, totque Theologorum habeant sententiæ? An putas, hæc tot diversas mortalium motiones & mutationes ab animâ alioquin immutabili proficisci? Neutiquam sanè, sed prodeunt partim ex infinitâ penè elementorum mixturâ, unde numerosa exurgit temperies; partim ex multiforâ meatuum structurâ, quæ simul à commixtis parentum seminibus, calore vivido & spiritu animato perfusis, cum virtutibus & vitiis in progeniem transmittuntur; redit ad authores genus, stirpemque primam degener sanguis refert: Oriuntur quoque partim ab aëre, cælo & solo; *Temperie cæli corpusque animusque juratur*; Ver novum blandis dum aspirat favoniis, florido nitet colore facies, & gratissima menti affulget hilaritas; ventres hyeme calidiores, animi tristiores; Thebani agrestes; Orientales Septentrionalibus mansuetiores & prudentiores; Asiæ Europæis animò & mente inferiores; *Ægyptiacæ mulieres veneris impatientissimæ*: necnon etiam illæ corporum & animorum vicissitudines, partim à cibo & potu proveniunt: Quanti enim interest ad vitam alimentum, & ad ejus diuturnitatem castigata vivendi norma; tanti ad frænanda pathemata certus cibariorum modus; & abigendis animi malis apta severaque victûs ratio: adeo ut natura simul & medicina; hominum salutis perstudiosè æmuli, corporis & animi vitia valeant emendare, unamque hanc unâ curam habeant præ-

cipuam, ut quæ extant omnia, etiam quæ veneni speciem præ se ferunt, se dent & cedant in humanæ salutis usum: Hæc vel illâ vescendi lege, aut exlege quilibet edendi consuetudine, puri vel impuri spiritus, detæcatus aut fædatus sanguis acceptam ab edulis integritatem aut spurcitiem invehunt animæ, & offensam, si Platoni & Galeno fides; nobis verò christianè credentibus in animum, qui bene aut malè revera se habet, ad laudabilem & perversam sanguinis & spirituum temperaturam; iracundus si fervidior, benevolus si temperatus, segnis si frigidior, si concitator audax & temerarius, si siccior prudens & sagax, si humidior stupidus & amens: Unde alliatis & piperatis ferventior factus sanguis, & tumultuosiores redditi spiritus, proniorem præstant animum, tum ad iram, tum ad venerem; *Excitat ad venerem tardos eruca maritos*; cum Cerere & Libero non friget Venus; vinum ita obumbrat sapientiam, ut ex convivâ supercilioso & ex Catone morio fiat & histrio; indefensâ crapulâ, ingeniorum peste, immergitur animus, mentisque aciem obtundit ingluvies; sic lurcones corpore faginantur, animo macrescunt; abstemii solertes & perspicaces; tantùm ad animi virtutes, sicut & morbos conferunt cibus & potus.

V.

TOT & tantis animi morbis si velis occurrere, per te licet, ni tuus gratissimus error manus recuser auxiliares: ad sacram medicinæ anchoram quàm velocissimè confugas; opprime dum nova sunt animi mala semina morbi; nam serò paratur præsidium, cum mala per longas invalere moras. Ab incunabulis natalium primò vitia resarcias est opera: pretium, apto & opportuno nutricis lacte, cum liberaliter bene institutâ educatione, optimis fœtâ & fretâ exemplis; ut naturam, quantum fieri potest, expellas furcâ, nec usque recurat: sit tibi vivendi lex & regula: temperatus evades; si temperiùs vivas; & magis ac magis in nos sævient animi perturbationses & morbi, quò plus turgebit humoribus corpus: ex insensissimâ animo, variorum dissimiliumque multitudinem eduliorum, sub quorum sarcinâ & pondere, ut ge-

mit corpus, ita obrutus calor natus languet varietate di-
 stractus, mens quoque à seipsâ dissidens secum discordat:
 nam statim atque simul assis miscueris elixa, simul conchy-
 lia turdis, dulcia se in bilem vertent, stomachoque tumul-
 tum atque animo lenta feret pituita; sic sanguineus in pi-
 tuitosum vertitur, biliosus in melancholicum commutatur.
 Num? te iracundiâ percitum & ferocientem serenitati pristi-
 nâ restituet ad lipopsychiam usque, si sit necessum, venâ se-
 ctio, aut tenuissimus victus, vel largus frigida haustus. Num-
 rē? cæcum amoris ignem valent extinguere, labor improbus,
 intricata negotia, adversa fortuna, gravissimus morbus,
 fuga, ultra satietatem & vires *ἀπεψθια* aquos, largissima
 cruoris effusio, frequens caphuræ, lithospermi aut nenufa-
 ris usus; quibus catullientis seminis cæstrum orgasmumque
 compefcere & sui impotentem amantium amentium Zelo-
 typiæ furorem arcere, non ita perarduum est. Numquid?
 securum & audacem ex-meticuloso liberalis præstat meri-
 potus; quod idem queunt efficere quàm plurima alia medi-
 camina, ut opium; sicuti quoque perplexis cogitationibus
 theriacam consulit Galenus, forsitan potiùs recentem, ut
 mærori coccinum, & tædio tabacum. Nec inquinabit super-
 bia mores, si fors fortunæ pessima, & res sanitatis minimè se-
 cundæ; nec regnandi dira cupido uret per multos dies super-
 bientis animum, si miserum ejus corpus gravioribus & chro-
 nicis percellatur morbis. Uno verbo quidquid est morborum
 animi, compefcere aut saltem demulcere poteris; si genio
 non indulgeas; sed *ὀμβροτος* quàm frigide & parcè victites; si
 nimum sapere nolis; si solutus omni scenore paterna rura
 bobus exerceas tuis; si nidulantes in penetralibus diutiùs
 humores averruncare curaveris; si salutaribus & benignis
 irrigata succis nituerint viscera; si bilis ferocia sileat; si sal-
 sus ichor in venis exundans dulcescat & ablegetur; si pi-
 tuitæ congeries amandetur, ipsiusque bilis atræ & teterrimæ
 sævitia obtundatur. Quemadmodum enim accensus san-
 guis, & putrefacti humores accommodatis & conducibili-
 bus remediis, cum naturâ redeunt in gratiam, & amissa re-
 stauratur sanitas; sic abalienatus criùor, atque animi mor-

horum vi & violentiâ inordinati spiritus, depravati que humores, appositâ & convenienti diætâ, antiquiore & unicâ olim medicinâ queunt redintegrari; sic nova laudabilisque inducitur temperies; ab exquisito temperamento probi mores, & ab optimis moribus frugi animus, integer vitæ, scelerisque purus, atque mens sana in corpore sano.

Ergo animi morbis Medicina.

Domini Doctores disputaturi.

<i>M. Joannes Roberts.</i>	<i>M. Claudius Puyton.</i>	<i>M. Abraham Thevart.</i>
<i>M. Ludovicus Gayant,</i> <i>Medicus Regius.</i>	<i>M. Claudius Berger.</i>	<i>M. Nicolaus Lienard,</i> <i>Censor.</i>
<i>M. Franciscus Vezou.</i>	<i>M. Claudius Biendisant.</i>	<i>M. Philippus Doué.</i>

Proponebat PETRUS GAMARRE Parisinus
Baccalaureus Medicus. A. R. S. H. 1684.

Apud Franciscum Muguet, Regis & Facultatis Medicinæ
Typographum.